



Tunngaviusumik inatsisissaq pillugu isumalioqatigiisitap unitsinnissaa, kiisalu isumalioqatigiisitami sulinerup unitsinneqarnissaa pillugu Inatsisartut aalajangiineranniit atuutilersussamik Naalakkersuisut peqquneqassasut Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

Siullermeenera

Inatsisartunut ilaasortaq Aqqalu C. Jerimiassen, Atassut Tunngaviusumik inatsisissaq pillugu isumalioqatigiisitaq pillugu siunnersuuteqarneranut qujassuteqarfigaarput.

Siunnersuuteqarnermini tunngaviusumik inatsisissaq pillugu isumalioqatigiisitaq unitsinnissaa, kiisalu isumalioqatigiisitaq sulinerup unitsinneqarnissaa pillugu Inatsisartut aalajangerneranniit atuutilersussamik Naalakkersuisut peqquneqassasut siunnersuutaanut Naleqqamiit imatut oqaaseqaateqassaagut.

Nunatta namminersulernissaanut tunngaviusumik inatsimmik suliaqartussaq Inatsisartut 2016-imi pilersippaat. Isumalioqatigiisitaq 2017-mi upernaakkut pilersinneqarmalli, suliniarnerat ilaatigut akunnaatumik aporfeqartarlunilu ingerlasimagaluartoq maannakkut sulineq sulinerullu naammassinnissaa Naleqqamiit qilanaarutigaarput.

Tunngaviusumik inatsisissaq suliaasoq nunap inuinit kinaassutitsinnut tunngaviliisut ilagisussaavaat "kalaallit inuit kulturiannut, oqaasiinut, kinaassusaannullu tunngaveqartumik sinaakkusiisumillu" suliaqartussaalluni sulimmat.

Taamaasilluni inuiaat Kalaallit nunap inui tunngaviusumik inatsisissaq pillugu isumalioqatigiisitaq inatsimmik tunngaviusumik nutaamik siunnersuuteqartussaavoq.

Naluneqanngitsutuut Naleraq tassaavoq nunatta naalagaaffinngornissaanut pimoorussilluni anguniagaqartoq aammalu tamatuma anguniarnerani Naalakkersuisooqataalernitsinni isumaqatiginniarnermi tamatuma qaqileriffiginerani naaperiaalluta isumaqatigiisutitta ilagaat tunngaviusumik inatsisissap naammassineqarnissaa pimoorutissagipput.



Nunatta naalagaaffinngornissaanut alloriarnissatsinnut suliaq aallartisarfiiit ilagaat taamatut suliaqarneq.

Naleqqamiit qilanaaraarput, kalaallit tunngaviusumik nammineq suliarisatsinnik inatsiseqalernissarput.

Namminiilivinnissamut suliat aallartittut ilagilluinnarpaat uagutsinnut utaqqinata nammineq iliuuseqarluta aallartillugu suliaq ingerlanneqarpoq, utaqqiinnaraluaruttami angusaqarsinnaanngilagut aamma nalunngilluinnaratsigu inuiaat nunallu allat takkunnavianngitsut namminiilivinnissamik neqeroorfigiartorluta, taamaammat tamatuma piareersarneqarnera piareersarneralu nammineq uagut nunap inui aallaavigalugit taakkulu nammineq oqartussaalerlutik ingerlatsilernissaat nammineq sanarfillugulu suliasaraarput.

Sapersorisoqarnera aammalu upperinnittoqannginnera uggornarpoq aammalu aningaasaqarnitta aaqqiiffiqineqaaqarnissaanik oqariartortartut nangiarsaaralutillusoq uagut eqqarsaatitsinniit ungasissutut inissisimasuupput. Naleqqamiit upperaarput sapinngitsugut aammalu kiffaanngissuseq aningaasamik pisiarisinnaanngilarput.

Unammilligassaqarpugut aammalu nunatut kiffaanngissuseqalernissarput nuna allatuulli unammilligassaqartuassaaq, tamatumalu anguniarnerani kiffaanngissuseqarusunnerput aporfilersorneqarani qanoq iliuuseqarfiginissaanik periarfissarsiorfiusussaavoq.

Naleqqamiit uagut upperilluinnarparput nunarput nammineq ingerlassinnaagipput nunasuarmioqataalluta, nunatta inui aallaavigalugit nunap inui isiginnaartuinnaajunnaarlutillusoq aqutsinissamut ajukkunnanngivipput aammalu nukissaqarluartut upperaarput, sapinngilagut kinaassuseqarpugut tamannalu aallaavigalugu kiffaanngissuseqarusuppugut.

Tamatumalu orninnerani Tunngavisumik inatsisissaq alloriarfiit ilagiinnarpaat Naalagaaffinngornissatsinnut.

Tunngaviusumik Inatsisissaq pillugu Isumalioqatigiissitaq isumaliutissiisummik tunngaviusumik inatsisissamut missingersuusummik suliaqarpoq, tamannalu Kalaallit Nunaat namminersulerpat atuutilertussamik tunngavisut pingaartut ilagissavaat.



Kalaallit Nunaata nammineerluni naalagaaffinngornissaanut, tunngaviusumik inatsisissatut missingersuusuaq suliarineqarpoq taamaammallu Atassut oqariartuutiginiarsarisaa isumalioqatigiissitaq kusassaataannaasoq, namminiilivinnissamut suliaqarnertut taallugu neriulersitsiniartussaq Naleqqamiit isumaqatiginngilluinnaqqissaarparput.

Naleqqap naluneqanngitsutuut Naalagaaffinngornissarput angorusuppaa, Nunarput Qallunaat Nunaata, Nunallu Avannarliit taamatullu nunat allat akornanni Kalaallit Nunarput inissimanissaa angorusullugu Nalagaaffinngornissarput angorusullugu suliniuteqartuuvoq.

Naalagaaffinngornissaq angorusupparput nammineq eqqarsarsinnaanerput atorlugu nammineq misigissutsigut atorlugit nammineq qanoq iliuuseqarsinnaanerput nunap inui nammineq aallaavigaluta nunarput ineriartortissinnaagipput upperilluinnaratsigu.

Sapinngilagut nammineq isumarput atorlugu naliliisinnaassuseqarpugut taamatullu allanik naalakkersorneqarnatalu nammineq nunarsuarmioqataalluta ingerlatsisilernissarput Naleqqamiit angorusutaraarput.

Taamaammat Tunngaviusumik inatsisissaq suliaasoq nunap inui pillugit taamatullu kinaassutitsinnut tunngaviliisut ilaat uagut aallaavigaluta Kalaallit inui kulturitsinnut, oqaatitsinnut kinaassutitsinnullu tunngaveqartumik sinaakkusiisussaallunilu suliaqartussaalluni sulisoq unitsinneqarnissaa Naleqqamiit Naalagaaffinngornissamik anguniagaqartuusugut akuerinngilluinnarlugu siunnersuut sakkortunerpaamik itigartilluinnarlugu taamatut oqaaseqateqarpugut.

Inuiaat Kalaallit sapinngitsorsuuvugut Naleqqamiit peqatiseeraassi ataatsimoorluta Naalagaaffinngornissamut ingerlaqatigisigut. Nalornisut qulartut aporfilersuisullu takutitsiffigisigut sapinngitsorsuusugut.

Qujanaq.